



Sud BiH Istraga protiv osumnjičenih za organizovani kriminal i trgovinu ljudima

ELVIS SALČINOVIĆ I NJEGOV SIN TONI NA SLOBODI

Denis Hamidović, drugi sin Elvisa Salčinovića, odlukom Suda ostaje u pritvoru naredna dva mjeseca • U BiH i nekoliko evropskih zemalja organizovali grupe džeparoša koje su pljačkale turiste

Sud BiH odbio je prijedlog Tužilaštva BiH da se Elvisu Salčinoviću i njegovom sinu Toniju Hamidoviću produži pritvor za još tri mjeseca, te su im određene mjere zabrane napuštanja mjesta boravišta, putovanja, sastajanja ili komuniciranja sa suosumnjičenim i svjedocima u ovom predmetu, odnosno osobama koje mogu imati neposredna saznanja o krivičnim djelima, te naložio obavezno javljanje nadležnim policijskim stanicama.

U odnosu na osumnjičenog Denisa Hamidovića Sud je donio rješenje kojim se pritvor produžava za naredna dva mjeseca, odnosno do 23. novembra.

Podređen položaj i pritisci

Salčinović i ostali terete se za organizovani kriminal, trgovinu ljudima, nasilničko ponašanje, posjedovanje oružja i falsifikovanje isprava, odnosno da su u BiH i nekoliko evropskih zemalja organizovali grupe džeparoša koje su pljačkale turiste.

Inače, Sud je dvojicu osumnjičenih pustio da se brane sa slobode uprkos tome što je tužiteljica Diana Kajmaković upozorila da bi oni mogli pobjeći iz BiH, te da se svjedocima već diskretno prijetilo.

Tužilaštvo BiH, podsjećamo, provodi istragu protiv Vehbije Salčinovića, Elvisa Salčinovića i drugih jer su osnovali grupu u kojoj su bili Denis Hamidović, zvanj Bebica, Serdo Salčinović (ranije Šefko Hamidović), Toni Hamidović, zvanj Ramica, Luka Hrustić, Kenan Fmđić, Davor Zorić (ranije Davor Hamidović), zvanj Fehid, Mahir Alihodžić, Brajan Hrustić (ranije Fajko Hamidović), zvanj Bajrica, Golub Osmanović, Samson Sečidović, Safet Hrustić, zvanj Sloba, Nedeljko Dakić, Božidar Tršić, Bahira Husarčić, Svuda Sejdčić, Liza-beta Fazlović, Dženita Fmđić. Oni se terete da su vrbovali žene te njihovu djecu radi džepnih krađa. Te osobe su doveli u podređeni položaj konstantno koristeći silu, ali psihološki pritisak kao što je zabra-

na kontakta sa njihovom djecom koja su bila na čuvanju kod drugih osoba, ukoliko ne bi bili zadovoljni količinom novca koji bi dobili.

Zrtve su organizovane u "čelije" od po tri osobe koje su kontrolisali drugi članovi kako ne bi za sebe zadržale dio ukradenog novca. Osumnjičeni su zrtve savjetovali šta da govore i kako da se ponašaju ako ih uhvati policija, pa su tako, kad bi pale policiji u ruke, zrtve govorile sa se zovu kašika, viljuška, štikla, šnala...

Naime, tužiteljica je navela da su osumnjičeni, koristeći se običajnim pravom Roma (gdje je običaj da je žena u podređenom položaju naspram muškarca) stupali u bračne i vanbračne odnose sa ženama koje su slali u Francusku gdje su ih tjerali da džepare u metroima, muzejima i na Eiffelovom tornju. Ukradeni novac žene su putem Western Uniona slale poznanicima osumnjičenih (policija je otkrila da su novac dobile najmanje 73 osobe), koji su potom pare predavali osumnjičenim i za tu uslugu dobijali određeni procent. Priljeni novac osumnjičeni su trošili na raskošan život, drogu, skupocjena vozila, kockanje, kupovinu "crvene kuće"... Vozila su registrovali na druge osobe od kojih neki nisu imali položen vozački ispit...

Osumnjičeni su posredstvom Nedjeljka Dakića i Božidara Tršića, službenika u opštinama Prijedor i Vlasenica, nabavljali lažne dokumente za sebe i zrtve, tako što su žrtvama izdavani dokumenti da



Sa pretresa u Lukovom Polju kod Zenice

su maloljetne, iako to nisu bile. Primjerice, Denisova nevjenčana supruga Šarlot Hadžović imala je dokumente da joj je 14 godina, ili su im izdavani dokumenti davno preminulih osoba, ili onih koji ih ovdav nisu vadili. Potom je Velid Hamidović, savjetnik konzularnog predstavništva BiH u Parizu, na osnovu tih dokumenata nelegalno izdavao pasoše. Kad bi ih uhvatila policija, oni bi nakon puštanja dolazili u BiH po nove dokumente i vraćali se u Francusku, Belgiju, Španiju, Italiju i Hrvatsku, dok su djeca žrtava ostajala u BiH.

Na ovaj način osumnjičeni su od početka 2012. do juna 2015. "zaradili" više od milion i po maraka, tvrde u Tužilaštvu. Elvis Salčinović se tereti da je iskorištavao suprugu Sabahetu Hamidović. Od Ramiza i Fadile Hamidović je dobio njihovu kćerku Lauru koju je poslao u Francusku da džepari skupa sa Šarlot Hadžović i Sabahetom

Hamidović. Tako je Sabaheta preko Western Uniona Elvisu prebacila 81.685 eura. Denis Hamidović je tjerao nevjenčanu ženu Šarlot Hadžović da krađe kako bi on imao novca za kupovinu novog automobila. Pošto je ona završila u bolnici, Denis ju je tjerao da na svoju odgovornost izade i nastavi s "poslom". Za ovo i druge poslove osumnjičenih francuska policija je saznala prisluškivanjem telefona osumnjičenih. Toni Hamidović je na džeparenje prisiljavao nevjenčane supruge Maddalenu Čizmić, zvanu Manda, i Alisu, zvanu Vala. Zabilježeni su razgovori iz kojih se vidi da je Toni tukao Maddalenu i Alisu, zbog čega je ona pobjegla od njega. Čizmićeva je iz Francuske poslala preko 99.000 eura Tonijevoj nevjenčanoj supruzi Lamiji Mukić.

Senad Dupovac, advokat Denisa Hamidovića, naglasio je da njegovo branjenik prije nije bio osudi-

van, te da se osnovana sumnja da je počinio krivična djela bazira samo na presretnutim razgovorima i da nema dokaza da je primio neki novac. Dupovac je rekao i to da se Denis Hamidović bavi skupljanjem starog željeza. Potom je naglasio da je Velid Hamidović ranije radio u policiji u Zenici, a potom otišao u diplomatiju, gdje je izazvao skandal jer je umješšan u kriminal oko prodavanja pasoša.

Saslušanja u Francuskoj

"Ako je i bilo organizovane grupe, koja je činila krivična djela, onda je, s obzirom na funkciju koju je obavljao i ovlasti koje je imao, vođa te grupe mogao biti samo konzul Hamidović, jer je on Romima omogućio boravak u Francuskoj", rekao je Dupovac, dodajući da je čudno da za njega Tužilaštvo ne traži pritvor.

On je dodao da osumnjičeni Romi nisu imali platu od 3.000 eura, kao Hamidović, partijsku knjižicu, na raspolaganju vozača i službeno vozilo, niz diplomatskih beneficija, niti im djeca pohađaju privatne škole. Ravnopravnost osumnjičenih Roma u odnosu na Hamidovića ogleda se u tome da su za Hamidovića odmah tražene samo mjere zabrane, a za osumnjičene Rome 90 dana pritvora, iako su već u pritvoru proveli 90 dana.

Tužiteljica Kajmaković istakla je da još nije došla do svih svjedoka i saslušala ih, te da će krajem mjeseca istražni tim otići u Francusku kako bi saslušali svjedoke. Ona je dodala da su iz pritvora pušteni Luka Hrustić i Kenan Frndić koji su priznali krivično djelo i pojasnili svoje uloge te kako je funkcionisala kriminalna grupa.

Podsjetimo, Salčinović i sinovi uhapšeni su krajem juna u akciji CD. Tada je u akciji SIPA i francuske policije privedeno 15 osoba (u BiH sedam, a u Francuskoj osam), a u našoj zemlji pretreseni su objekti i vozila na devet lokacija u Zenici, Vlasenici, Prijedoru i Jajcu.

D. P.



Privođenje osumnjičenih u prostorije SIPA